



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tir_yimiyim

tir yimiyim TAPAK 7

**ICC T20I Cricketer of the Year
atema Arshdeep nominate süogo**

**Yemen airport amakdang WHO
tekolakba tera agi tasü nungi jenbu**

VOL. XXII ISSUE NO. 78 (ADOK 78) DIMAPUR TENTONÜ (MONDAY) LUCHII (DECEMBER) 30, 2024 ₹ 5.00

Russia-i tayimtsü dak khaloktsü: Azerbaijan President

New Delhi, December 29, 2024

(Agencies): Taoba hopta Kazakhstan nung Azerbaijan Airlines tayimtsü ka tsükokdang nisung 38 asü aser iba tayimtsü dak Russia nungi khaloktsüba liasü ta Azerbaijan President Ilham Aliyev-i Deobarnü ashi.

Russia-i iba tayimtsü dak khaloktsüba miimbangtsü merang saka Russia-i iba lendong atema tenüng agitsüla ta Aliyev-i ashi.

Russia nung nisung kari iba tayimtsü tsükokba osang miimbangtsü merang. Iba tayimtsü nung nisung 67 mena aliba nungi 38 asü ta President Aliyev-isa metetdaksü.

"Russia lushu nung Grozny yimti anasa Azerbaijan civilian plane dak khaloktsü" ta paisa shisem. "Electronic warfare systems

ajanga tayimtsü maniteti aküm. Kasa mapang nung alilen nungi injang khaloktsüba ajanga tayimtsü tesülen kanga mejungi raksatsü" ta President Aliyev-isa ashi.

Russia President Vladimir Putin-i Honibarnü Aliyev dang lendong tulu atalokba atema tatok meshiba sülen tanü Aliyev-i iba osang metetdaksü.

Passenger plane ji Grozny nung anentsü merangdang Russian air defences mapa teinyakdak liasü ta Putin-isa ashi.

December 25 nü tsükokba tayimtsüji temalen nungi raksatsü ta Azerbaijan transport minister-i metetdakja liasü.

"Iba tayimtsü nung mena alir ajaki tayimtsü Grozny madak ayimndang apokba ola asem angashiba shiogo" ta Minister Rashad Nabiyevev-i ashi.

NSCN (U)-i Renben Mozhuu indang jangjashitsür

Guwahati, December 29, 2024

(Agencies): National Socialist Council of Nagaland-Unification (NSCN-U) nung undersecretary Renben Mozhuu ta ser nisung ka apuba dak sendakba nung NSCN-U-i osang jangjashitsüogo.

GPRN/NSCN (U) nung Renben Mozhuu ta ser nisung shinga mali aser iba nisung den tesentaktep kecha mali ta

Ministry of Information and Publicity (MIP)-i metetdaksü.

Mozhuu ya kodanga associate member ka maliasü aser pa den tesentaktep kecha mali ta MIP-isa ashi.

Bangdakpurtemi iba tasa tamajung atema kuli tejangja bushitsü ayongzük. Taila osang prokshirtem dak ozüng tapet agi mapa inyaksüla ta MIP, GPRN/NSCN (U)-isa ashi.

Dimapur Wozhuro Range Union hon jubilee among



Dimapur, December 29, 2024

(TYO): December 28, 2024 nü Dimapur Wozhuro Range Union (DWRU) küm 50 ajungba benjung ayongzükä mongogo.

Agri Expo 4th Mile Chumoukedima nung amongba sentong nung Principal Director, Health & Family Welfare Dr. E. Motsuthung Patton-i tetushi süa jaoker ka ama shilem agia liasü.

Dr. M. Patton-i jubilee tetezü rasa ashi aser züngsemtem dang iba tashi len anir aruba atema Tsüngrem nem tenüngsang agütsütsü ayongzük.

Wozhuro range nung alirtem ya yimjung meimertem ta ajaki meteta lir anungji züngsem ajaki iba senmang tejakleni bener aotsü aser yimjung o temeim osang prokshitsü ayongzük. Naga loktiliba yanglushitsü nungdaka lir aser ochishiba,

tiyazü mejembiba aser meranga inyakba sobaliba benshitsüla ta Patton-isa ashi.

Paisa tsüraburtem dang pei chirnurtem skill development activities agitsü ajungshitsü kechiyong sorkar mapatem joko mali kümogo ta paisa shisem.

Dr. M. Patton-isa Diphupar nung Mrs. & Mr. Chumthungo Khuvung'er kibongi tenla agüja yangluba jubilee nungshilung sayatsü. Iba ali ya taoba minister asür John Lotha-i DWRU nem tenla agütsüba lir.

Iba sentong nung Dimapur Lotha Hoho chairman, Thungchanthung Murry aser Chumoukedima Lotha Hoho, chairman, Nchumthung Murry natia o jembi.

Iba benjungmong nung DWRU-i founding members 16 nem tetushi agütsü.

India-i South Korea tayimtsü nung asürtem mang ayimer



December 29, 2024 nü Seoul, South Korea nung Jeju Air CEO Kim E-bae (abelen nungi pezübuba) den executive züngsemtemi parnok meyong passenger plane ka tsükokba sülen osangbener den jembir tatok meshidang agiba noksa ka angur.

New Delhi, December 29, 2024

(Agencies): Muan city, South Korea nung tayimtsü ka tsükokdang nisung 176 asüba atema India-i temulung raksaba osang lemsatepogo.

Iba lendong ya Deobarnü atalok aser India-i tasür kibong ajak den asükhu lemsatepba metetdaksü. Iba mapang India-i akokba tashi South Korea nem teyari agütsütsü ta India-isa ashi.

"Tanü Muan airport nung tayimtsüng tsükokba osang angashia temulung raksar" ta India's Ambassador to Seoul Amit Kumar-i ashi.

Onoki asür kibong ajak den külemi mangyimer. Indian Embassy-i Republic of Korea nung aser sorkar den külemi noktaker. Iba lendong ajanga linük anaprong aoksadaksüogo aser alima ajungai iba lendong atema sasaa bilemstür ta Amit Kumar-isa metetdaksü.

Küm 15 tejen Boeing 737-800 tayimtsü ya Bangkok nungi South Korea-i meyipa arudang tsükok.

Deobarnü iba tayimtsü indang landing gear nung timtem ka adok aser mazüokteti aküm. Iba ajanga tayimtsüji runway toktsür lungro agi yangluba atsü ka dak

oa tsükodang mi adoka arong.

Iba lendong nung nisung 176 süogo aser parnok rongnung tetsür 83, tebur 82 aser mejangjatetba nisung 11 densema liasü, ta South Korean fire agency-i metetdaksü.

South Korea nung acting president, Choi Sang-mok-i cabinet züngsemtem den rongdak senden ka ayonga menogo.

Sorkari iba lendong atema yariteper aser akokba tashi mapa inyakdar. Tasür kibongtem yaritsü atema mapa inyaker, ta Choi-i ashi.

Gauhati HC-i Nagaland dena state 4 dang jail yanglushitsü tuyur

Guwahati, December 29, 2024

(Agencies): Gauhati High Court (GHC)-i Assam, Nagaland, Mizoram, aser Arunachal Pradesh dang central aser district jails atema tebilemstü lemsatepogo.

Chief Justice Vijay Bishnoi aser Justice Kaushik Goswami na adenba division bench kati

state sorkartem dang inspection committee ajanga ashiba ama mapa inyakba osang meshiogo.

August 20, 2024 nü Gauhati High Court nung Registrar General-i agütsüba inspection report nungsa onük aika bendenloka liasü.

Ajisüaka state pezüi iba

affidavit atema telangzüba magütsüba atema January 29, 2025 tashi nung detailed affidavits den telangzüba agütsütsü tetuyuba agütsüogo.

"Assam, Nagaland, Mizoram aser Arunachal Pradesh state tem dang comprehensive affidavits agütsütsü tetuyuba agütsür" ta GHC-i metetdaksü.

Centre-i class 5 & 8 atema 'no-detention policy' agiener

New Delhi, December 29, 2024

(Agencies): Centre-i class 5 aser 8 atema 'no-detention policy' agienogo aser iba ajanga year-end exams majangertem class temabai meyoxtsü.

2019 nung Right to Education Act (RTE) yanglushiba sülen state 16 aser Union Territory 2 nung class ana atema 'no-detention policy' agienogo.

Centre-i gazette notification ka nung regular examination agiba sülen kaketshir kati promotion criteria metongtetra additional instruction agütsütsü aser ita ana tsüngda re-examination atema maongka

agütsütsü.

Ajisüaka tanur jagi re-examination nung ano promotion criteria metongtetra, class 5 mesüra 8 nung tanaben mendaktsütsü ta Centre-isa metetdaksüogo.

Tanur kasa class nung mendaktsüba sülen class tesayuri tanur den tsüraburtem len anitsü aser nungdakra specialised inputs agütsütsü ta Centre-isa ashi.

Centre-isa tanur shinga elementary education metembang tashi school nungi memendoktsü maneni jangjashitsüogo.

Iba tetuyuba ya Kendriya

Vidyalayas, Navaodyala Vidyalayas aser Sainik Schools dena Centre sorkari lapokba school 3,000 tema atema lir ta Ministry ketdangsur kati ashi.

"School education ya state subject ka lir anungji state sorkartemi iba dak sendakba nung lemtet agitsü akok. State 16 aser Delhi dena UT 2 nung class 5 aser 8 atema no-detention policy agienogo" ta paisa ashi.

"Haryana aser Puducherry ajanga lemtet kecha magi lir aser tanungba state aser UT temi iba policy maneni benshir" ta ketdangsurisa ashi.

OCSU kum 75 ajungba jubilee mungogo



Old Changsu Students Union (OCSU) tenzükür kum 75 ajungba Platinum Jubilee benjongmung December 28, 2024 nü Old Changsu Village nung amungdang OCSU nungshilong semzükür tangokba noksa ka nung Dy. CM Y Patton den ketdangsürtem angur.

Dimapur, Luchii/December 29 (TYO): Old Changsu Students Union (OCSU) tenzükür kum 75 ajungba Platinum Jubilee benjongmung December 28, 2024 nü Old Changsu Village local ground nung mungogo, kong Deputy Chief Minister and Home & Border Affairs Minister, Yanthungo Patton tetushi tesemdanger ama dena liasü.

Iba jubilee sentong nung jembidang iba lokti tenzükür aser Old Changsu Students Union nung shilem agir nem Patton-i tenüngsang agütsü aser iba jubilee ajanga nübürtem rongnung tesunep alitsü aser tarutsü nung lokti meimba lanur adoktsü imlar ta shia liasü.

Platinum jubilee ya lenir tajung, takok angur aser tashi temeteter adokdaksüba benjong ka südaksütsüla, ta

Patton-i ashi. Taoba mapang pai yimtsüng nung tantsü-tambo aser kaketshir lenirtem den tesendaktep aliba aser ajangshibatem lemsatöp aser kaketshirtem dang item lenirtemi tatishitsü tajung yutsüba angazüka lokti aser yimtsüng khuret abenba lenir ka-ka akumtsü ayongzük.

Paisa kaketshir dang pei shilem aser teinyaktsü angateta bendanga agütsür meranga azungtsü ayongzük.

Iba sentong metenzükükdang Dy. CM Y Patton-i jubilee nungshilong semzüküka OCSU nisan songtsü aser iba nungshilong ya Rev. Dr. Nzan Odyuo, Principal, Golden Crown Theological College, Dimapur ajanga meshiteta sarasademja liasü.

Iba jubilee benjongmung omen "Pruning for Excellence"

nung ajemdaker Dr. Apeni Lotha, Retired Director, Higher Education ajanga jembidang lanu putu nem shisaliok aser skills angazükdaksütsü ayongzüküka liasü.

Iba sentong nung Lotha Students Union tir Lirhonthung Kithan, Englan Range Students Union tir Chonbernthung, aser Old Changsu Village Council Chairman Elithung Ngulli nungeria o tatsütsü jembia liasü.

Sentong nung Eyingbemo N. Shitiri, President, OCU ajanga pela agizüküba o jembi, L. Thungpen Lotha, Convenor, Jubilee Planning Committee ajanga melepzüng o jembi, Ekyimo Odyuo, President, OCSU (1977-1978) ajanga OCSU kumtetba otsü lemsatöp aser C. Chonbemo Shitiri, Pastor Old Changsu Baptist Church ajanga jubilee temoatsü meshia sarasadema liasü.

Bhutan nungi Meghalaya ajanga long abenba anentsü akhanger



Meghalaya police-i West Garo Hills district, Meghalaya nung Rongsai anasa Bhutan nung trucks 15 shi soita aliba noksa nung angur.

Tura, Luchii/December 29 (Agencies): Social activist Cherian Momin-i Meghalaya sorkar dang Bhutan nungi state ajanga Bangladesh-i long bener aoba tangsa anendaktsütsü akhanger aser yangji tim masüba mapa inyakba den lenmang mejungi kumdaktsür ta ashir.

Meghalaya Chief Minister Conrad K Sangma dangi shiti ka züluba nung, Bhutan nungi state ajanga Bangladesh leni long bener aoba mapang long tali oshia abener, temelaba makai transport syndicates tenzükür, tashiyim amshia senotsü meshir aser NH-51 aser AMPT amala lenmangtem kanga mejungi

raksar, ta Momin-i tebilemtsü lemsatöp.

Bhutan-India-Bangladesh linüktem tsüngta shishilempaba nung tesendaktep alitsü tongtipang, saka agreement nung shia aliba ama shidak inyaktsü nungdaker, ta pai ashi.

Iba agreement nung shia aliba ama long belentsü atema Bhutan indangr trucks masü saka India indang trucks amshir, ta pai tuteta ashi.

Bhutan nung mamshiba multiple-axle trucks tem amshir, anungji iba operations ya tejangja masü amai kumdaktsür, ta ashi.

Bhutan nungi long belenba ya "Indian mafias aser illegal groups" temi amokbanga lir,

anungji pei jurila ajangzüktsü atema iba tensa amshir, ta Momin-i ashi.

Item inyakyim ya ajanga nübürtem tetsüba aser teimla makai yutsür aser tongtipang lenmangtem kanga sashia raksaja Garo Hills nung alirtem takum nung kongshir, ta pai ashi.

RTI densema kuli balala nungi truck tem nung long tali abenba sayur, aser ibaji ozüng alema lir, ta Momin-i ashi. Pai India nungi third-party trucks tem tekeratiba nung nokdangtsü aser long belenba nung NH-51 lenmang mamshidaktsütsü ashi.

Momin-isa iba inyakyim kanga junga bushisüngdangtsü aser ochishia inyaktsü ayongzüküka liasü.

GPRN/NSCN ajanga asükhu lemsatöp

Dimapur, Luchii/December 29 (TYO): KukidolongVillage nungi ZhehnikhuYepthomi'er jabaso aser külem tenzükür PekiyaYepthomi, Tatar (UT-1) ajungbena December 27, 2024 nü asüba osang angazüka aoksar aser kanga jashir, ta GPRN/NSCN sangdong ka ajanga ashi.

Asür Pekiya Yepthomi ya temeim agi sünga aliba aser Naga nunger asoshi tasü ita

nokdaker nisung ka liasü. Pa April 12, 2003 nungi tasünü tashi linük meimba mulungsentüsü nung tasü ita Naga linük tenzüküko. Pa asüba ajanga tawa adokba kanga jangja metettsü aser asüngtsü tasak alitsü.

GPRN/NSCN ajanga mangyimer kibong den asükhu lemsatöper aser nenok mulungjang nung tashi tasen aser tesuneptsüba agüjangma, ta sangdong ajangasa ashi.

Meghalaya tekülem ki telung nung "Jai Shri Ram" ayimtenba aitsür



Shillong, Luchii/December 29 (Agencies): Meghalaya nung Mawlynnong church telung nung Akash Sagar ta süir nisung kati dangar nisung ana jakdang ola tulu adoka asadenba video ka ajanga Khristanpur aser nübürtem kanga jashitepba mapang lir.

Khasi Jaintia Christian Leaders' Forum (KJCLF) ajanga iba tatalokba aitsü aser Sagar-i Khristanpur tekülem ki telung nung "Jai Shri Ram" ta ayimdenba densema pa mapa ya asaa telemsa aser makmakshimak adokdaksütsü mechi inyakba lir ta aitsü.

Tawa temelaba makai Mawjymbuin cave telungi aiba, Cow Protection Yatra aser linük tesem balala nung Christmas benjong nung timtem agütsüba densema amangbapur anema mapa tamajung inyakba KJCLF ajanga lemsatöp aser item ya tamangba yimsü tsütsü kati ka magizükütketba aser nübürtem tesunep nung melidaktsütsü merangba tali akumba kuli tem

sayur ta ashi. Central Puja Committee (CPC)-ia iba tatalokba atema tejashi lemsatöp aser district administration dang Sagar anema tekeraba nung mera agitsü ajungshia liasü.

Sagar inyakyim ya kin o kin tsüngta mepetmesü adokdaksütsü mapa aser Meghalaya nübür mezüngmeshiba lir, ta Hynniewtrep Youth Council (HNYF)-ia aitsü.

Meghalaya sorkari tapet mera agia Sagar memerenshira, onoki merenshitsu, ta parnokki amokmeren.

Social activist Cherian Momin-i iba tatalokba ya tekülem ki meshi-meshia ayuba nung aibelenba lir aser nübürtem tiptema alitsü asoshi tetsükdaktsü tulu lir ta ashi.

Linük tesem balala nung iba amala tatalokbatem tali akumba indang paia tuteta ashi aser itemji kin balala tsüngta lirumedema melitetba temaitsü lir ta ashi.



Manipur nung village defense volunteer ka tepsetba mechi Joint Action Committee (JAC) ajanga ghonda 24 mokdangtsü ayongzüküka Honibarnü nübürtem timtema liasü. Police commando temi December 14, 2024 nü village volunteer Laishram Prem tepseta liasü aser nisung trok apu.



December 29, 2024 nü Indore District nung Defence Minister, Rajnath Singh-i BR Ambedkar asoba tesem nung asür nem akhüm agütsüdang tangokba noksa nung angur.

Lok Sabha election nung bendanglen alir aikati vote magütsü: EC

New Delhi, Luchii/ December 29 (Agencies): Taküm Lok Sabha election nung bendanglen alir India nungertemi kanga tejangraba tulu nung vote agütsüsa atema register asü (lakh 1.2), ajisüaka vote agütsüsa atemabo ishika dang India-i aru.

Election Commission-i, 2024 küm bendanglen alir India nunger 1,19,374-i register asü aser teimtibaji Kerala (89,839) nung register asürtem liasü, ta metetdaksü.

Bendanglen alir India nunger lakh 1.2-i vote agütsüsa atema register süaka Lok Sabha election nung vote agütsüsa atema bendanglen alir 2,958 dang India-i aru. Nisung 2,958 nungjagi parnok 2,670 bo Kerala nungi liasü.

Karnataka, Uttar Pradesh aser Tamil Nadu state tem nungbo vote agütsüsa atema bendanglen alir shinga maru.

Ato kilonser Narendra Modi'er state Gujarat nunga bendanglen alir anati dang India-i arua vote agütsü.

Maharashtra nunga bendanglen alir voters 5,097 nungi parnok 17 dang bendanglen nungi arua vote agütsü, ta EC-i metetdaksü.

Tang aliba electoral ozüng nung ajemdaker vote agütsüsa atema register süa alir bendangertemi vote agütsüsa atema peipei Lok Sabha aser assembly constituencies-i arutsüla. Parnok ket nung pei maitsü sayutsü atema original passport alitsüla.

Andhra Pradesh nunga register süa alir NRI voters 7,927 lir saka vote agütsüsa atema nisung 195 dang India-i arua liasü.

Assam nung register süa alir NRI voters 19 lir saka vote agütsü shinga maru. Bihar nunga registered NRI voters 89

lir saka shinga maru.

2018 küm August ita nung 16buba Lok Sabha senden nung bendanglen alir India nungertem tenüng nung kar nem vote agütsüdaksüsa melatsü atema bill ka agizüka liasü, ajisüaka iba bill ji Rajya Sabha nung mebenokteti liasü.

2020 küm Election Commission-i Union Law Ministry dang Electronically Transmitted Postal Ballot System (ETPBS) facility ya bendanglen alir India nunger nem-a agütsüsa mepishia liasü. Ajisüaka tang tashi sorkari telemetba magi.

Bendanglen alir India nungertemi vote agütsüsa atema India-i arudang sen jenti indoker, mapa nung timtem adoker aser kaketshirtemia takoksa angur, anungji parnok nem-a ETPBS facility agüjang, ta Election Commission dang mepishia liasü.

Asenoki achiba chiyungtsü ya aluyimertemi züsentetba lir: Sonam Wangchuk

New Delhi, December 29 (Agencies): Climate activist, Sonam Wangchuk-i aluyimertem longkak aitba tesem semdanga aluyimertem lenir, Jagjit Singh Dallewal ajurua liasü.

Arrshi küm 70, Dallewal-i taküm November 26 anogo nungi tenzüka Khanauri arrtsü nung lumia longkak aitba manener.

Wangchuk-i, "Ladakh nung alirtem ajak tenüng nung aluyimertem pusemba metetdaksüsa atema ni iba tesem semdangar," ta

metetdaksü.

Paisa, Dallewal anogo aika lumiba ajanga o jembitsü atema-a pa kanga tashimait liasü, ta ashi.

Wangchuk-i nüburtem dang aluyimertem pusemstsüla, ta ayongzüka pai, "Asenoki achiba chiyungtsü ya aluyimertemi züsentetba lir," ta ashi.

Honibarnü Supreme Court-i Punjab sorkar dang December 31 anogo tashi nungbo Jagjit Singh Dallewal hospital-i anir aotsüla, ta tuyuogo.

Aluyimertemi minimum support price (MSP) densema

takhangba onük balala agüja asentenshir longkak aiter.

Samyukta Kisan Morcha (Non-Political) aser Kisan Mazdoor Morcha leniba nung aluyimertem Punjab aser Haryana na tsüngda Shambhu aser Khanauri border points nung taküm February 13 nungi tenzüka longkak aiter.

Anogo ishika tejaklen (December 6 aser 14) longkak aiter aluyimer 101-i Delhi tashi longkak aita jajatsü apusoa liasü saka Haryana security sepaitemi parnok nokdanga liasü.

Taküm Jammu & Kashmir nung kiralongrar 75 tepsetogo: Army

Jammu, December 29 (Agencies): Taküm küm tenzüker tang tashi nung security sepaitemi Jammu & Kashmir nung kiralongrar 75 tepsetogo; sepaitemi tepsetba kiralongrartem shilem 60 bo Pakistan nungi liasü, ta Army ketdangsertemi metetdaksü.

"Pakistan-i pusema kiralongrar. Region nung kiralongrar telok balalai lisopur lanur pezü dang aniokteta liasü," ta parnokisa metetdaksü.

Taküm J&K nung kiralongrar 75 tepsetogo; iba tetezü J&K nung anogo pongu shia kiralongrar kabo tepsetba den kasa lir, ta army-isa metetdaksü.

Kiralongrar 17 bo Line of Control (LoC) aser International Border (IB) adena aitsü merangba mapang nung tepset aser kiralongrar 26 bo J&K nung khatepba mapang nung tepsetba lir.

Jammu region kübok district pongu- Jammu, Udhampur, Kathua, Doda aser Rajouri

aser Kashmir Valley kübok Baramulla, Bandipora, Kupwara aser Kulgam district tem nung bendanger kiralongrar 46 tepset.

Jammu & Kashmir kübok district 9 nung bendanger kiralongrartem aika lir aser bendanger kiralongrartem teimba tepsetba district ji Baramulla (9) nung liasü.

Baramulla nung tepsetba bendanger kiralongrartemji Sabura Nala area, Main Uri sector, Kamalkot Uri, Chak Tappar Kriri, Nowpora, Hadipora, Sagipora, Watergam aser Rajpore tesemtem nung tepsetba liasü.

Jammu & Kashmir nung lisopur kiralongrartembo kanga ajema kümogo aser Pakistan nunger kiralongrartembo aika anünga lir, ta army ketdangser kati metetdaksü.

Taküm Jammu & Kashmir nung kiralongra tatalokba balala 60 nung nisung 122 tepset aser asürtem rongnung civilian 32 aser security sepai 26 densema liasü.

Manmohan Singh mitsü Yamuna ayong nung inoktsüogo



December 29, 2024 nü New Delhi nung taoba mapang Ato kilonser, Manmohan Singh kinüngtsü, Gursharan Kaur-i Singh mang arongba mitsü indoktsü atema Asth Ghat-i arudang tangokba noksa nung angur.

New Delhi, December 29 (Agencies): Taoba mapang Ato kilonser, Manmohan Singh tasü mang Honibarnü arongba sülen Amongnü par kibong züngsemtemi pa mang arongba mitsü Yamuna ayong nung inoktsüogo.

Amongnü anepdang par kibong züngsemtemi Nigambodh Ghat nung pa mang arongba mitsü bendenba sülen 'Asht Ghat'-i bener oa Yamuna ayong nung inoktsü.

Singh kinüngtsü, Gursharan Kaur den jala asem- Upinder Singh, Daman Singh aser Amrit Singh nunger den par kinüngertem ayongkümi oa mitsüji inoktsü.

Sikh nunger yimsü nung aliba ama par kibongi January 1 nü 'Akhand Path' agitsü aser January 3 nü Rakab Ganj Gurdwara nung 'bhog', 'Antim Ardas' aser 'kirtan' sentong agitsü.

December 26 nikongdang Singh temang mejungi AIIMS Delhi-i anir oa yari, saka meküzmükteti ghonda ishika tsüngda asü.

Honibarnü Nigambodh Ghat nung asüpila sentong tatembangbuba agia liasü aser iba sentong nungji linük Tir Droupadi Murmu aser Ato kilonser, Narendra Modi na densema lenir aikati asür nem akhüm agüja aden.



December 29, 2024 nü Udhampur district, Jammu & Kashmir nung Patnitop hill station anasa rürjep alaba sülen tourist bus ka tsükoka aliba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 30, 2024

Nübertem ain madokdaksütsüla

Naga nungersa süaka, Naga yimten nüchiso bushitsü tenzüka anogo nungi tanü tashi nung Nagaland nung alir Naga nungertemsa timtatemba, takoksaba aser shisa tebuluba bolua arudagi. Aji oda, Naga nunger telok ka kümer Naga yimten nüchiso bushi tenzüka tanübo telok zünger mezüngma kümogo aser item teloktemji taküm alitsü rongsen bushi dang Nagaland nung alir Naga nungertem tsübudakja shisaboludaksüba agi nübertem kanga mepela kümogo. Atangji, kin ka asoshi yimten nüchiso bushitsübaji telok ka kisüng khureta masü aser kidong ka nem nungloksütsüa makok saka ibaibo senso shia teinyaktsü, anungji yimten nüchiso atema raraba tongpang nung nokdaksübaji senso shia asoshi pei tetsü tasoli kümzüksü atema inyaktsüba mapa ka asütsü. Ajisüaka, tanübo Naga yimten nüchiso atema raraba tongpang ya telok telok balala lemsar, Naga nungeri Naga nungertem tsübudakja sen saruba aser sen meshiba mapang ka mesüka kümogo. Ibayongji, Naga yimten nüchiso asoshi nokdakertem rongnunga nüchiso bushir asü mesüra sen bushir (?) ta asüngdangtsüsa aiben ataloker. Atangji, yimten nüchiso asoshi raraba tongpang nung nüboa nüngdaksü aser alima rongsen nüngdaksü, anungji iba tongpang rara ya nisung ishika agi akümba telok kati masü saka nübertemi nübertem asoshi raraba tongpang ka asütsüla. Idangji dang tangaria asenok temeten tajungba angatetsü aser nübertemia mulungsua shilem agitsü. Ajisüaka, tang amai Naga nunger mapa inyakerem yaritsü melen temerenshi-ang merenshia tamakangtsü kanga amokmerena, iba jagibo nübertem tejashiang jashidaksütsü. Idakji ajak atema lendong aser takoksa keta lir. Tanü Naga nunger atema yimten nüchiso bushir telok kati Naga nunger ka dang sen lakh tenem meshibaji, odang meshirba masü saka pai terenlok mapa ka shitak meinyakba ajanga senchi meshir ta metedaksüba angashiogo. Ajisüaka, Naga nunger kati contract mapa shitak meinyakba atema sen meshia agitsübaji shitak masü, kechiyong mapa shitak meinyakbaji shitak süra mapajing shitak inyadaksütsüla. Iba yagi, ano, tanü Naga yimten nüchiso bushir teloktem ya Nagaland nung terenlok mapa shitak inyadaksütsü asoshi repranger telokang ka kumadok asü (?) ta bilemdangtsüsa tatalokbatem agi asenok mulung nung jembir. Atangji, yimten nüchiso menguaka, India sen agi Nagaland kanga junga renloka otetra, ashiko, iba jagia asenok nüchi akümtsüa akok. Ajisüaka, tang tangbo Nagaland nung terenlok mapa junga meinyakbatem repringdanga orr senchi chidi asünungbo, shitak meinyaki aliba mapatemjibo repranger mereprangma aser senchi chidi asüyonga chir mechima alitsü südi. Aji oda, tang tesüsa asenok ajaki ngua atalokba mapa kaji, Dimapur nung nisung meyerijang anasemka menshi town hall tilaka yanglushiba nung sen crore 19 tashi endokba mapa yaa ka asütsü. Asenok tia majung iba ama temulung melemtetba mapatem ya tebushir mali ajak tachir dang kümogo. Iba ama asen mapang, tiyazü putu nung ketdangser kari nübertem meyong sen mashimashi amshir aser kari tashiyim agi nübertem tsübudakja saru meshir aser kari sen tatakzük (percentage) ka akanger ta süa-süa lenirtemi nübertem jashidaksüra, iba jagi tamajung aser tejashiang tuluba akümtsü. Aji oda, nüchiso ya nübertem asoshi, anungji nüchiso bushirtemi nübertem ayongsemer tsükchir tsübudakja takok angutsü merangtsü melen, nübertemang amokmerena tashi angadaksütsü merangra, ashiko, khen anabenbo tsübuba agi tashi angatsüa akok saka nübertemi iba ama tekangshi aser maksü tiaji marezmükteti anema apusotsü. Joko, Naga yimten nüchiso bushir teloktema Naga yimten nüchiso jenjang ka bushitsüba dak alaka nübertem ain adokdaksütsüsa tanga kecha mebushitsüla. Idangji dang asenok den Tsüngrem adentsü aser asenoki tejangja yimten telatetba kati arutettsü.

OLEMSABANG

TENÜKMEREMJI LEP AMA TAOCHI MAKÄ

~ L. Kika Pongener

(Yashi adok nungi...)

Yosef daka tedi nungeri tenukmerem aser mokokachi agi alar asütsü ayok, saka iba bendang lima nungji oagi meyiper Yosef chuba akümtsüsa Tsüngremi ajungket, aser Yosef Ijip lima nung chuba menden nung mena aliba agi, Yosef'er tsürabur aser tedi nunger kibong ajunga ayawara tesashi nungi kümzüksüsa tensa tia bentsür aru. Yosef-i tedinunger dak mang-ayangtsü bilem asübo, maongka tajung nguogo...Saka Yosef-i meyiper tedi nunger dang kanga junga benshi. Aji oda, Tsüngremi balaka shimtetba nisung kar lir, itemjibo nisungi kechi koma ka tenukmerema arishiaka, Tsüngremi parnokji jenjang tajungba tajungba dang kümdaksütsü aser temaba menden nung ajungkettsü... ta Yosef taküm otsü nungi küli tejangja lesson ka angur.

Tanü putu nunga nisung aika taküm nung iba ama tensa tiaji ajurua alitsü akok. Aji oda, asen adianu, asen pur-medemer, temba-tinur, külem tenzüker kar nem Tsüngremi tangar dang nungi balaka sempet agüja alitsü akok, mesura Tsüngremi kanga azükaroa ajungkettsü akok, mesura lokti mapa ajak nung shilem tajung agitetba agi nuburi kanga ketasena akümtsübua amshitsü akok. Aji oda, iba ama sempet tajungji ngur pei adianu, pur-medemer, temba-tinur aser külem tenzükertemi, tenukmerem aser mokokachi agi arishitsü akok, saka shinoki ajemalua Tsüngrem tsüngken tsübur, parnokji Tsüngremi balaka ajungkettsü aser moatsütsü. "Shir ajemalurtem lir parnok temoatsüba; kechiaser parnoki alima senmangji amangtsü" (Mat-5:5). Aji oda, shirnok nem Tsüngremi sempet tajung agütsür, aser taküm nung azükaroa moatsür, mesura jala-jabaso tajung jenjang tajung moatsür, ibaji Tsüngrem'er maongka, temoatsü aser senmang lir. Ibaala sempet aser temoatsüjibo nisungi kechi koma'ar ka tenukmerema arishiaka memeneptsü aser jungnatsütsü merangyongjia makoktsü.

Aji oda, nisung kari parnok anema-bo tamajung kecha inyaka mali sernung, iba sempet tajungji majinui, mesura tangari junger ta tenungasangba majinui tenukmerem agi tamajung inyakra...Tsüngrem tsüngdang khuret tulu asütsü. Tsüngrem o-i ashir, "Ne dang tamajung kecha inyaka melira, kecha masü nung nai nisung ka den terara" (A.Shin-3:30). "Shibaisa tajung melena tamajung agütsüdir; par kibong nungi tamajung mepilatsü" (A.Shin-17:13). Aseni tangar jenjang junga aliba aji raksatsütsü merangra, meyiper asen jenjang-ang raksatsüsa mapangi bentsür arutsü. Shirnoki tangar dak tenukmerema tamajung inyaker, iba küsaji pei dangia meyipa arutsü. "Shibai kangla tangar asoshi yanglur; pai yangluba kangla nungji pa asonger. Pa mapa tamajung pa dangi meyipa shilanger. Pa sentong tamajung pa tekolak nung atemer" (T.Ken-7:15-16). "Temeim-i tenuk memeremer" (1 Kor-13:4). Aji oda, asenok dak Tsüngrem temeim lira, asenoki kodanga tangar dak tenuk memeremtsü. Anungji asenok tamanger ajaki iba tenukmerem mokokachi temenen nungi jenbua alitsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristmas mapang state aika nung Khristantem anema inyak



Kerala kübok Nelloppilly nung aliba sorkar school ka nung Khristmas sentong tagidak mapang Sangh Parivar züngsemtemi amakba anema lanurtemi carol sentong temeja ka agidang tangokba noksa nung angur.

December 29, 2024:

Khristmas sentong ka nung India Ato kilonser, Narendra Modi-i Yisu Khrista tesayubatem benshitsü ayongzüka liasü saka Khristmas mapang linük tesem aika nung Khristantem Khristmas sentong agiba mapang nung timtem agütsüogo, ta International Christian Concern (ICC)-i metetdaksü.

Manipur, Rajasthan, Uttar Pradesh, Punjab, Uttarakhand, Gujarat, Meghalaya, Madhya Pradesh, Odisha aser Kerala state tem nung VHP aser Bajrang Dal densema Sangh Parivar organizations aikati Khristantem anema inyakba osang lir.

December 23 nü New Delhi nung Catholic Bishops Conference of India (CBCI)-i ayongzüka Khristmas sentong ka nung Ato kilonser Modi densema liasü. Iba sentong nungji jembidang Ato kilonseri Yisu Khristai sayuba ama temeim, yimjung aser adianu temeimtep alitsü ayongzüka liasü.

Modi-isa X ajanga ajak den Khristmas tepela salem lemsatepa liasü.

Ajisüaka Hindu right-wing organizations pusemertemi Khristantem Tenla kitem, schools, public tesem aser nija kitem nung Khristmas sentong agiba mapang nung timtem agütsü.

Khristmas mapang nung Kerala nunga Khristantem anema inyakba ya taoksatsü osang ka lir, kechiyong iba state nungbo yimsü balala amangertem tsüngda tesünep nung alir.

Khristmas mapang Kerala kübok Pallakad district nung VHP züngsem ana den Bajrang Dal züngsem kati sorkar school ka nung Khristmas benjung

amongertem amakba sülen Khristantemi longkak aita liasü. Ano Kerala nungsa mejangjaba nisungtemi Yisu Khrista asoba tesem mesüka yangluba benjung sübotsü raksatsü.

Malankara Orthodox Syrian Church nung Metropolitan, putir Yuhanon Meletius-i social media ajanga, “Yangjibo (New Delhi) parnoki putirtem aser benjung sübotsü akhümtsübur saka yangjibo (Kerala) parnoki benjung sübotsü raksatsür,” ta metetdaksü.

Punjab nunga Pentecostal pastor kati Hindu nungertem Khristan yimsü dangi meypdaksütsü meranger, ta tai tonglokja azük.

Rajasthan nung Hindu yimsü alia amangertemi Jodhpur aser Jaisalmer na nung aliba school tem nung Khristmas benjung amonger tesayurtem aser kaketshirtem amak.

Khristmas anogo nung Madhya Pradesh nung Zomato (chiyungtsü delivery agency) nung inyaker kati Santa Claus ama sübor lia Hindu Jagran Manch züngsemtemi pa dang asüngdangyaa liasü. Parnokisa Zomato nung inyakterem amokmeren.

December 23 nü Madhya Pradesh kübok Jabalpur region nung Mari kürakyanglu ka raksatsü. Mejangjaba nisung anati Usri yim dak Tenla kidang nungi Mari kürakyanglu agizüka bener aoba sülen Tenla kidang nungi mile ka shi pilar kürakyangluji raksatsü.

Madhya Pradesh yimtiba, Bhopal nung Sangh Parivar züngsemtemi ki ka nung Khristantem tekülem sentong agiba nokdanga liasü.

Manipur state nunga Khristmas anogo nung Imphal kübok Sinam Kom yim dak kari injang khadoka liasü.

Meghalaya state nunga social media influencer kati Tenla ki kati tua sabang nungi ‘Jai Shree Ram’ ta ayimdena video tangokba sülen social media nung lemsatep.

Iba tatalokba anema Shillong nung social activist kati pa anema ken o benokogo.

Gujarat kübok Ahmedabad yimti nung VHP züngsemtemi South International School nung Khristmas benjung sübotsü ajak agizükdakja liasü.

December 24 nü Ahmedabad nung school pezü nung Khristmas benjung amongba agi Hindu nungertemi amak.

Uttar Pradesh yimtiba, Lucknow nung Hindu nungertetsür-tebur telok ka Hazrat Ganj Tenla kima adenshiba sülen ayimdena Khristmas sentong tagidak mapang timtem agütsü.

Odisha nunga Khristmas anogo nung Balasore district nung Khristan aseme Hindu nungertem Khristan yimsü dangi meypdaksütsü meranger ta tai tonglokja azük. Iba sülen par asem rongnung tetsürlajibo süngdong ka nung alena yur kangshia Hindu nungertem tsüngremtem tenüng shidaksü.

Khristmas atongtsü mapang anasa Odisha yimtiba, Bhubaneswar nung pastor ka aser pa kinüngtsü na dak azük aser kangshia Laishiba nung ajemshidakja liasü.

Haryana nung Khristantemi Khristmas amongtsü atema hall ka mekazüka liasü saka Hindu nungertem hall telung jagi ia Hindu nungertem ken aten aser Khristantem sentong agiba nokdanga liasü.

Uttarakhand state nung Khristantem house church ka nung Khristmas amongba mapang nung Bajrang Dal züngsemtemi timtem agüja liasü.

Khristmas mapang Plateau state nung Khristan 14 tepset

December 29, 2024:

December 22, 2024 nü Nigeria nung Plateau state nung aliba Evangelical Church Winning All (ECWA) nung Khristmas carol agiba sülen mapang tatsüka tsüngda prangpong amer telok kati mashisa ka aser arrshi küm I kinü tanur

ka densema Khristan 14 khaset.

Plateau state kübok Jos yimti nungi mile 22 shi pilar Irigwe Khristantem Khristmas carol agiba sülen mapang tatsüka tsüngda Islamic Fulani kiralongrartemi parnok amak.

ECWA Arogo nungji

Khristan 1,000 shi lir. Khristan katibo anasa aliba checkpoint ka nung sepaitem dang jelia security meshia liasü saka sepaitemi security magütsü.

Irigwe lisopurtem ya teimbaka Khristantem lir. Mapang shia Fulani teloki parnok amaker.

ANO GO ABEN TSÜNGREM DEN

Nüngdak: Khrista den taküm aliba tesendaktep

- *Mathi 4: 18-25*

Theologian tular, Karl Barthe, mapang ka nung tajitetba ka ashi, “Khristan yimsüji Khrista nungi pilar kecha südanga tatsü ka danga alitsü makok”.

Khrista nükjitung nungi pilar tamangeri merangba mapaji taittsüba o bendang bena aruba aser tejashitsü otem lir. O ka nung, chichiba tamangerji Khrista den sendaktepba alir aser iba mulungsentsü aser mapatem jagi teti mapa inyaker. Yamaji, asen mapa ajak mapa tajunga süaka taküm aliba Khrista nungi mesüra, pei konang, nüngsang asoshi bilemba agi ajungmesoba dang asütsü.

Asenok mapang Khrista den taküm aliba tesendaktep akatsü kanga nüngdaka kümogo. Iba nüngdak tulujü taküm aliba Khrista den tashi tait tesendaktep aliba bushitetsübaji lir.

Itemi shisadangang : Nai Khrista indang tejangja metet. Nai Khrista metetta lir ta bilemer asü ? Khrista den tembar tesendaktep koda kija takümi katettsü ta nai bilemer? Nai tangar den Khrista indang jembitsü jangrar asü? Nai ibai tatemsa kodang jembü?

Sarasadem : Onok atsüang, onoki Ne sülen anidaktsü.

Tenangzüka: Aser ni alima ajungketra, ni nisung ajak pei sasa dangi atsütsü. Yohan 12:32.

Uganda nung Muslim nungertemi Khristan sayutsüngir ka tepset

Nairobi (Kenya), nung par kibong tanaben

December 29 (Agencies): kidangi aruba sülen para ki ka Anüdoklen Uganda nung nung liasü. Ita ka tsüngda par Khristan sayutsüngir ka par kinünger Muslim nungertemi parnok meypa arubaji metet amokmerenba ajanga pai par ki toktsür jena liasü saka par kinüngertemi pa bushia tepset.

December 16 nikongdang 2022 küm January ita nung 6:00 ako meta James Habiibu James Mukenye Habiibu aser Arogo ka nung sayutsüngitsü pa kinüngtsü nati Islam yimsü atema par kidang nungi toktsür Khristan yimsü motorcycle ka nung Buseta-i agizüka liasü. Muslim nungertem

kinüngertemi December 16 nü Pa kinüngtsüi, “Aonung pa tepsetba sülen December 7:30 ako meta kü kinüngbui 17 nü pa tasü mangji Kagumu phone ajanga kü dang nisung Sub-County, Kibuku District kari ghonda tesadang shi pa nung angu. Pa arrshi küm 29 sülen anishidar ta metetdaksü. Iba sülenjibo pa den

tongtepratep mesüteti liasü,” James’er kibongi Khristan yimsü agizüka sülen ta metetdaksü.

Tasüngnep 8:00 ako meta la kinüngbu phone ajanga amokmerena liasü.

James kinüngtsüi, “Onoki tangar nisung kati, ‘Iba phone Khristan yimsü metoktsüra kibur ya süadokogo’ ta la nem metetdakja liasü. Iba tatalokba sülen Kibuku anungji iba aonungjisa onoki Central Police Station nungi tanga district kati jena ao aser police aser Lyama nungi police senteper James tepsetertem yangji aliba Tenla kidang bushidar.

James-i pa kinüngtsü den chirnur asem toktsür pilar. Ajisüaka taküm October ita

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Tawa

(n) ali kimung tesadem aser tazüing (open space)

* Tawa aliba tesem nung tanurtem asayar.

Tawa

(n) küm aika alu mechii ayuba arem (forest reserved for many years)

* Taküm kümbö asen yimer tawa lu achitsü.

OLONG PAITEP # 7021

Grid for OLONG PAITEP # 7021 with numbers 1-19 in various positions.

TIPILEN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüingdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüingda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 7020 TELANGZÜBA

TIPILEN :

- 1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA



Texas nung amenoka aliba drone show company Sky Elements-i alima otsü tasen ka yanglutetogo. Sky Elements-i US drones 5,000 amshia ghonda tesadag ka Santa Claus pa indang sleigh nung mener sayua liasü. Iba ajanga parnoki "Longest Animation Performed by Drones" Guinness World Record ka yangluteta liasü. December 20, 2024 nü North Richland Hills, Texas nung Birdville ISD Fine Arts/Athletics Complex nung Christmas show sayua liasü. Sky Elements-i tang agi Guinness World Record 11 buba yanglutetogo aser China-i yangluteta aliba otsü ajatetogo.

Manipur Congress-i Manmohan Singh nem tenüngsang agütsü



Imphal, December 29, 2024

(Agencies): Taoba Prime Minister Manmohan Singh-i kümsük 10 tashi inyakdang Northeast aser talisa Manipur atema terenlok mapa aika inyaksüogo ta Manipur Congress Legislature Party (CLP) leader, Okram Ibobi Singh-i ashi.

Taoba PM Manmohan-i Manipur kanga meim aser iba jagi special category status agütsü ta pai ashi.

"Iba teyari ajanga assembly,

high court building, aser civil secretariat tasen yanglu. Manmohan Singh kümsük mapang hill districts nung infrastructure bener aru aser district hospitals o power substations yanglutsü" ta Ibobi-i ashi.

Manmohan Singh ya Manipur nungi Armed Forces Special Powers Act (AFSPA) agienba mezüingbuba Prime Minister liasü ta teti bilemtetsü ta State Congress president Keisham Meghachandra-ia

ashi.

"Assembly segments 7 nungi AFSPA agienba aser Assam Rifles ket nungi Manipur nunger nem Kangla Fort agütsüba ya tongti teinyaktetbatem liasü aser nübortemi mapang talangka takhangba agüja aruba onüktem liasü" ta pai ashi.

Tanü Congress Bhavan, Imphal nung Manmohan Singh mangyimba sentong ka nung Congress lennirtem aser züingsemtemi naro yuja tetushi agüja liasü.

Tripura school ajak nung CCTV enoktsü: Sorkar

Agartala, December 29, 2024

(Agencies): Tripura nung school tem nung CCTV cameras enoktsü meratem agidar ta state sorkari High Court dang shiogo.

Tripura kübok school tem nung kaketshirtem kümzüka ayutsü indang public interest litigation (PIL) ka

angadangdang state sorkari iba ya ashi.

Advocate Kundan Pandey-i benokba PIL nung school tem nung safety measures tajungba agütsütsü shia lir.

Tripura kübok district 8 nung schools 4,905 nungi school 218 nung dang CCTV cameras enoka lir ta okadaki

ashi.

Sorkari shilem lemsar CCTV cameras enoktsü mapa inyaker ajisüaka nija school temi National Education Policy, 2020 nung lateta aliba ama inyaksü ta sorkarisa metetdaksüogo.

Iba ken o ya February 6, 2025 nü maneni angadangtsü.

Girijananda Chowdhury University nung international conference amongtsü

Guwahati, December 29, 2024

(Agencies): Assam nung Girijananda Chowdhury University-i mungdang tulu ka ayongzüka agitsü.

January 21 & 22, 2025 anogotem Guwahati campus nung International Conference on Political, Economic and Cultural Pivots in the Past, Present and Future of Central, South and South-East Asia ayongzüka agitsü.

Iba sentong ya India aser Russia tsüingda tesentaktep

yanglur küm 75 ajungba tenüing nung agitsü.

Iba mungdang ya School of Humanities and Social Sciences, GCU-i Russian State University for the Humanities, Moscow; Institute of Oriental Studies, Moscow; Primakov Institute of World Economy and International Relations, Moscow aser Kut University College, Iraq nunger den yaritepa ayongzükur.

GCU-isa researchers aser practitioners dang mungdang

nung sayutsü atema high-quality papers agütsütsü metetdaksüogo.

January 10, 2025m tashi nung abstracts agütsütsü aser iba nungi teshimteteremi January 15, 2025 tashi nung full papers agütsütsü ta parnoki ashi.

Shilem aginürtemi Dr Bhaswati Sarmah (Ph: 9706927546) mesüra Dr Bondita Baruah (Ph: 8724097391) den tongteptsü akok.

Assam nung Yaba süngjang 50,000 apu; Nisung 2 sota lir

Guwahati, December 29, 2024

(Agencies): Assam police telok kati Cachar nung Yaba süngjang aika puogo.

Cachar kübok Ghoongur Bypass nung international grey market nung Rs 15 crore shi alangba Yaba süngjangtem apu. Cachar police-i osang kar

angazükba nung ajemdaker kidanger state ka nungi aruba gari ka mita repring.

Idangji parnoki gari nung taseptsü pungu nung Yaba süngjang miima bena aliba angu. Iba atema temulung meleme bilemer nisung ana pua lir. "Osang tejangja kar

angazükba sülen Cachar police-i Ghoongur Bypass nung special operation ka agidang kidanger state ka nungi aruba gari ka sot" ta Chief Minister Himanta Biswa Sarma-i ashi.

Iba dak sendakba nung nisung ana pua lir aser gari police ket nung lir ta CM Sarma-isa ashi.

Menungra Bilemteter

Asür, Mrs Pangernungla (Lakhüni)



02/12/1963 to 30/12/2023

Tanü anogo teti atema tepila salem shir küm ka abensaogo, saka na meblemiang anogo ka danga süia maor.

Nü temeim, shisatsü aser mapa tajung onok mulungjang nungi kodanga mepilar. Tanü na onok den meliaka, onoki iba anogo na menungraseta sarasadema amunger.

Temeim Kinungbo, jala-jabasotem, semchirtem aser kinungertem.

OFFICE OF THE

MERANGKONGTSÜR TELONGJEM

H.Q. MERANGKONG

Dist. Mokochung, Nagaland.

TENÜNGSANGAGÜTSÜR

2024 küm tematiba Tsüngremer tashi akum kübok shirnoki meranga inyakba nung takok tajung ngutettogo, nenok nem tenungsang agütsür.

1. Wb. Marsanen Imsong, asür Yaongnok aser asür Tongpangkoka na jabaso Ao Senden nung Tir shimtetba asoshi.
2. Wt. Watisangla, asür Tsüknungrensang aser asür Maongkala na jala Nagaland State Co- Operative Bank Ltd (NSCB) nung Branch Manager jenjang tongtetba asoshi.
3. Sp. Lepzungchiba Jamir, Wb. Süsünüksü aser Wt. Ozungtula na jabaso National Bee Board Category (A) Life Member ngutetba asoshi.
4. Sp. Benjungakum, Wb. Meyidangit aser Wt. Moanaro na jabaso 2024 HSLC tatidang nung Top 9 jenjang ngutetba asoshi.
5. Kr. Tiarenla Longkumer, Wb. Moanungba Longkumer aser Wt. Imlikumla na jala 2024 HSLC tatidang nung Top 14 jenjang ngutetba asoshi.
6. Sp. Imkongsungit Jamir, Wb. Korachiba aser Wt. P Imlikala na jabaso 2024 HSLC tatidang nung Top 17 jenjang ngutetba asoshi.
7. Kr. Yashilemla, Wb. Subutemsü aser Wt. Lanurenla na jala 2024 Nagaland University Under Graduate tatidang nung Political Science nung Gold Medal jenjang ngutetba asoshi.
8. Sp. Ngopilemsa, Wb. N Temjen Jamir aser Wt. Bendangmenla na jabaso Deputy Manager (Officer Scale-I) IBPS jenjang ngutetba asoshi.
9. Kr. Yemnoktila, Wb. N Temjen Jamir aser Wt. Bendangmenla na jala Graduate Teacher, Department of School Education jenjang ngutetba asoshi.
10. Kr. Imsukumla, Wb. Nungsangtoshi aser Wt. Yangerinla na jala Pharmacist, Health & Family Welfare Department tatidang nung takok anguba asoshi.

Tsüngremi nenok nem agütsüba takum, sempet, mapa aser rongsen ajanga, tarutsü nung Tsüngrem sentsüwangshidakjang ta sarasadema atar.

Sd/-

TSUKNUNGPENLA

President

Merangkongsür Telongjem

Sd/-

LASANGLAYADEN

General Secretary

Merangkongsür Telongjem

ALI AYOKER

FOOTHILL LEMANGANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

Yemen airport amakdang WHO tekolakba tera agi tasü nungi jenbu

Sanaa, Luchii/December 29 (Agencies): World Health Organization (WHO) indang director general-i ashiba agi, pa aser par külem tenzüker tem Yemen nung aliba airport ka nung Isreal-i tayimtsü amshia amakdang tera agi takum kumzük.

BBC Radio 4 indang sentong ka nung sensaksemba mapang, iba lendong nung asütsü ama bilem ta Tedros Adhanom Ghebreyesus-i bilemteta ashi, kong nisung trok shi tepset.

Pa den danga UN staff tem UN nung inyaktertem pua aliba chiochtsü atema jembishinüa iba linük indang humanitarian tensa asadangba sülen Brehostibarnü Yemen anüdoklen Sanaa yutsür aotsü lia iba airport nung amak.

Israel indang mitkari itdangiterba nung ajemdaker Iran-i yariba Houthi meyong targets amak ta ashir.

“Yangji kanga bulutepa liasü, nüburttem taoksakang nung tesem ajaklen asemzua liasü,” ta Dr Tedros-i

Honibarnü ashi. Yangji jenokdak tesem kecha meliasü, anungji onok takum samatsüsa jenjang nung liasü. Missile ya tera dang meyipshi asübo onok kolak nung tsüchtsü liasü, saka tia aka, ta pai ashi.

“Anungji külem tenzüker temia küdang asenok tera agi tasü nungi jenbuogo ta ashi,” ta pai ashi.

WHO tekolak Dr Tedros ya iba lokti nung tekolak ka ama 2017 nungi inyaka arur aser Covid pandemic mapanga yimjak nung mapang shia nguogo aser iba airport nung mamakdang yongi pa yangji aliba nüburttemi meteter liasü ta ashi.

Ajisüaka paisa “Ni yangji alimaliji tongtipang masü. Civilian mashi ka takumji takum lir – kü takum ya dangar meimchir ka dang tajungba masü,” ta ashi.

Iba airport ya civilian meyong, anungji Israel-i mamaktsüla amak, ta Dr Tedros-i ashi.

Region-i Iran nung nok-nü shibelena arutsü atema Houthi

teloki iba airport ya amshia aru aser itemji amshia Israel amak aser Iran ketsdangsürtem yangji agizük, ta Israel Defense Forces-i ashir.

“Mitkar mapa inyachtsü asoshi Houthis ajanga civilian ki o jen amshiba tatishitsü ya ka lir,” ta ashi.

Houthi meyong Saba news agency ajanga ashiba agi iba airport nung nisung asem tepset aser 30 yiru.

Kasa mapang ano region nung power stations aser rongnendak tesem ka nung tenük yoker Israel-i amakdang nisung asem asü aser ter yiru ta parnokisa ashi.

Asü-amartem ya civilian asü mesüra Houthi züngsemar mejangja.

Iran-i yariba Houthi teloki Gaza Strip nung rara manen tashi Israel dak amaktsü nangzuka lir.

Rara tenzüker mezüing ita nungi Houthi telungpuri Israel dak maka arur aser Israel-ia Houthi nung dak tayang kepzuka amaker.

South Korea nung tayimtsü ka tsükok, nisung 176 asü

Seoul, Luichii/December 29 (Agencies): South Korea kübok Muan yimti nung passenger tayimtsü ka runway adena ajua or tsükoka mi adokba sülen nisung 176 süogo, ta linük National Fire Agency-i ashi.

Tayimtsü ya Deobarnü 9.03am local time (00:03 GMT) nung tsükoka liasü.

Thai yimtiba Bangkok nungi Jeju Air flight nung passenger 175 aser crew trok mener linük yimtiba Seoul nungi km 289 shi pilar aliba Muan International Airport nung anenba mapang iba lendong ya ataloka liasü.

National Fire Agency-i, tetsür 83 aser tebur 82 aser tanga gender 11 ta nisung 176 iba tyimtsü tsükoba nung asüba sülen mezüingbo parnok maitsü mejangjateti liasü, ta ashi.

Iba lendong nung crew

züngsem anabo kümzuka liasü. Tayimtsü nung mi adokba temsepogo, ta agency-isa metetdachtsü.

Fire agency ketsdangsürtemi ashiba agi, tayimtsü tsükokba lendong nung nisungtem taküm lia kümzüksübo kecha timla mali, ta South Korea indang Yonhap news agency-i metetdachtsü.

“Tayimtsü indang landing gear nung timtem kar liasü asütsü ta amanger aser media balala nung sayuba video tem nung tayimtsü ya tetsüing agi masü saka tebok agi anena runway nung ajua aoba sülen apokba nguogo,” ta Al Jazeera osangbener Rob McBride-i Seoul nungi metetdachtsü.

“Tenük kuli agütsürtemi tayimtsü ishíben apokba indang jembiogo aser noksatem nung tayimtsü nungi mi adokba

sayuogo,” ta paisa shisem.

Iba tayimtsü ya küm 15 tain Boeing 737-800 jet ka liasü, aser iba tayimtsü nung Thailand nung ana aser tanungba passenger tem ajak ya South Korea nungertem mena liasü, ta osang ajanga metetdachtsü.

Thailand Ato Kilonser Paetongtarn Shinawatra-i, tayimtsü tsükokba lendong nung taküm samaba kibongtem den asükhu lemsatepogo.

Thailand indang Ministry of Foreign Affairs-i, iba tayimtsü nung Thai nung mena liasü asü maliasü aji bushisüingdangtsü aser takaratiba nung teyari agütsütsü atema tetuyuba agütsüogo, ta Ato Kilonser-isa social media nung post ka ajanga metetdachtsü.

(Maneni tapak 8 nung...)

Georgia tir tejenlai menden yutsütsü memulunger

Tbilisi, Luchii/December 29 (Agencies): Georgia nung tang yimsü tesüdak Georgian Dream party den sendaktepa aliba tir tasenba tezüngzüktep agidang linük yimtiba Tbilisi nung nüburt meyirijang aika adenshia longkak ait.

European Union nung adentsü atema application agüja aliba songtemba sülen linük nung yimtenren tsütsü tongtipang mapang ka nung taoba mapang football asayar Mikheil Kavelashvili ya tir ama tezüngzüktep agiogo.

October ita parliamentary election agiba nung Georgian Dream-i takok angu, saka iba

takok anguba nung ashikülak mapa inyaka lir ta tai tonglokja aiben longkak aitba ajangshio.

Tir menden nungi alutsü alila Salome Zourabichvili-i Deobarnü menden yutsütsü memulung aser la ya shidakba tir ji lir ta ashi.

Tir aliba ki kima nisung adenshia alidak jembidang Zourabichvili-i tir aliba ki yutsütsü ta ashi saka la melener ta shidak masü ta aitsü.

“Shidakba tir amendang dang iba ki ya temaitsü ka lir,” ta lai ashi.

Yangnung jaki tatsüka pilar parliament nung Kavelashvili ya tir inyachtsü tenangzükba

agia liasü. Pa meina par kinunger arua liasü aser Ato Kilonser Irakli Kobakhidze iba sentong nung aden.

Tenangzüktep agiba sülen jembidang Kavelashvili-i Georgia nung sobaliba, jenjang, ayak, kibong temeshitet aser tamang indang tenüing sanga liasü.

“Asen tasoli aser sobaliba wazüka ayutsü asoshi zünger mezüingmai timtemba sülen Georgia nüburt asoshi yimjung ya nükjidong tongti rongnung ka liasü ta asen puti otsü ajanga tejangja sayur,” ta pai ashi.

Georgia indang opposition telok tongti pezüi Kavelashvili magizüker aser parliament

nunga maden.

Kavelashvili ya taoba mapang Georgian Dream party nungi MP ka liasü aser tir election nung candidate pa kisüing liasü. Pa shimba ya tiaüzü lir ta Zourabichvili-i taoba mapanga shia liasü.

Georgian Dream ya authoritarian ama kumtar, aser media aser bendanglen nungi senotsü teyari anguba non-government groups aser LGBT tem dak tenük yoker Russia nung yimya nung ozüing tem yanglur.

Russia-i tashi ajak amshia Ukraine amakba yong Western linük temi Georgia dang Russia nem temerenshi

tenokdangba agütsütsü shiaka parnoki meinyak aser West ya “global war party” ka lir ta shia liasü.

Georgia nung timbai par linük EU nung züngsem kumdachtsüner. Saka November ita linük nung ruling party ajanga 2028 tashi EU nung züngsem akumtsü atema mejembitsü ta shia liasü.

Iba sangdong ya ajanga Georgia linük nung anogo aika rongrong tulu adoka longkak aita riot police aser longkak aiter tsüingta raratepa liasü.

Georgia ya parliamentary democracy lir, kong tir ya linük nung tekolak aser ato kilonser ya parliament nung tekolakba lir.

ICC T20I Cricketer of the Year atema Arshdeep nominate süogo

Luchii/December 29, 2024 (Agencies): India nunger left-arm pacer Arshdeep Singh, ICC Men's T20I Cricketer of the Year award atema nominate süogo.

India team-i küm tepeyong kanga takok ngua asaya aruba mapang Barbados nung T20 World Cup akokba asaya densema asayatem nung Arshdeep-i tongtibang shilem agiba sülen pa iba naroküm atema shimogo.

Pa iba naroküm atema Zimbabwe nunger asayar Sikandar Raza, Australia nunger Travis Head, aser Pakistan nunger asayar Babar Azam nunger den tokteptsü.

Arshdeep-i 2024 küm asaya 18 nung wicket 36 agi aser pa indang bowling average 13.5 liasü. Bhuvneshwar Kumar-i 2022 küm T20I asaya nung wicket 37 agiba sülen Arshdeep ya India nunger asayatem rongnungi küm ka nung wicket timtiba agiba asayar tanabuba kümogo.

Arshdeep-i conditions balala



nung asaya akoktsüsa kanga junga asaya-a pa ya India team atema temulung lemtsü left-arm pacer ka kümogo aser T20 asaya nung pa India nunger bowler tem rongnung kanga tongtibang kümogo.

Küm tepeyong asaya aruba rongnung pai T20 World Cup final nung kanga junga asayateta India-i iba asayamung tanabuba akokba nung tongtibang shilem agia liasü. South Africa den final nung run 177 defend mapang Arshdeep-i tongtibang asayar Aiden Markram aser Quinton de Kock na out süja liasü. Asaya tatemi pressure nung over 19buba aonba mapang pai run pezü dang agüja India team

jenjang kanga junga kümdaktsü.

Jasprit Bumrah T20I asaya aika nungbo shilem magitetba ajanga Arshdeep nem bowling attack anir asayatsü atema maongka agütsüogo. Pa pitch aser condition balala nung kanga junga adapt süa asayatetba küm tepeyong asayaba mapang sayuogo. Pai kidang, Sri Lanka, South Africa, aser West Indies nunger ajak nung kanga junga adapt süa asayaogo.

Küm tepeyong nung Sikandar Raza-ia batting aser bowling naprongla nung Zimbabwe nem teyari agütsüogo. Travis Head aser Babar Azam napronglai Australia aser Pakistan team atema run aika yangluja liasü.

ICC Men's T20I Cricketer of the Year award ya iba format nung asayar tajungtibatem tushitsü atema agütsür aser Arshdeep-i kanga junga asayaba sülen pa iba award angutsü imlartem rongnung contender tajang ka kümdaktsüogo.

United Cup nung Germany-i Brazil tsükdaktsüogo

Luchii/December 29, 2024 (Agencies): Deobarnü United Cup title defend asütsü atema Germany-i kanga junga asaya Brazil 2-0 agi kokogo. World number two Alexander Zverev aser Laura Siegemund nati pei tata asaya koka parnoki iba asaya koka liasü.

Mezüngbuba kija asaya nung Siegemund-i 6-3, 1-6, 6-4 agi Beatriz Haddad Maia akokba sülen Zverev-i 6-4, 6-4 agi Thiago Monteiro amokbanger asaya liasü.

Taoba asaya nung China makokba sülen Brazil team group asaya nungi tsükogo. Germany aser China na Hombarnü asayaba sülen iba asaya akokba team quarter-finals-i aitsü.

Sydney nung world number six Casper Ruud-i kanga meranga asayar Tomas Machac akok saka pa

temerangdangba amajok liasü kechiyong Czech Republic-i Norway kokogo.

Zverev-i set anaprongla nung mezüngbuba asaya nung Monteiro indang serve break asü aser minute 80 tsüngda asaya koka liasü.

"Tang mezüngbuba onok 2-0 agi asaya ka kokogo. Taoba küm ni asaya ajak nung deciding (mixed doubles) asaya liasü," ta Zverev-i ashi.

"Iba asaya akokba atema aser Germany tenüng nungi tanaben asayatetba atema kanga pelar," ta paisa shisem.

Kasa mapang nung Siegemund-i ghonda anaser tasadang kanga meranga asayaba sülen Haddad Maia kokogo. Lai mezüngbuba set kanga junga akok saka tangbuba set nung tamakok ngua liasü.

Tatembangbuba set nung Germany tsürta ya asemben

tashi service break asütsü aliba nungi jenboa5-4 agi tejakdang aküm aser iba sülen asaya koka liasü.

"Season nung mezüngbuba asaya nung kanga junga asayatetba atema kanga pelar. Ni süngjem süngjema asaya-a maongka agütsü meranga liasü," ta Siegemund-i ashi.

Maneni Ken Rosewall Arena nung Czech Republic aser Norway na asaya nung Ruud-i kanga toktepa asayaba sülen 7-6 (7/6), 5-7, 6-4 agi Machac koka liasü.

Karolina Muchova-i 6-2, 6-2 agi Malene Helgo akokba sülen Ruud-i tanabuba asaya koka team ana 1-1 aküm.

Tarep temeyoktep asaya nung Machac aser Muchova nati 6-4, 6-4 agi Viktor Durasovic aser Ulrikke Eiker na koka Czech Republic-i iba asaya koka liasü.

Chouksey-i tetsür 50m rifle 3-positions national title benogo

Luchii/December 29, 2024 (Agencies): Local shooter Ashi Chouksey-i, Olympian Anjum Moudgil aser Shriyanka Sadangi nunger amala asayar tajungtem aika ajateta Deobarnü 50m rifle 3-positions asaya nung la asoshi mezüngbuba national title benogo.

MP State Academy nung 67buba National Shooting Championship asayaba mapang Ashi-i point 466.7 angu aser la Olympic nung anaben tashi asayar alila Anjum dang nungi point 3.1 agi timba liasü.

Iba asaya nung Maharashtra nungi lanur asayar Sakshi Sunil Padekar-i point 451.3 ngua bronze medal angu. Iba sülen lai junior women's 3P asaya nung

silver medal ngua liasü.

Ashi, shiba taoba küm ana tashi kanga junga asaya aryudar, la Paris Olympic Games trials nunga shilem agiogo, lai maneni kanga junga asaya-a qualifications nung point 590 ngua asayar ti asayaba final-i ia liasü.

Maharashtra nungi Bhakti Bhaskar Khamkar-i point 592 ngua la qualification nung temaba jenjang nung liasü aser Anjum-i point 590 ngua la tanabuba jenjang nung qualify asü.

Qualifications nung Sakshi trokbuba aser Olympian Shriyanka Sadangi tenetbuba nung liasü.

Ajisüaka final nung Ashi-i tanga asayatem ajak dang

nungi tajungba asaya aser mezüngbuba Kneeling' position round tembangba sülen la Anjum dang nungi point 2.3 agi timba aküm. Shot 15 sülen tanabuba 'Prone' position nunga la tejakdang liasü.

Tatembangbuba 'Standing' position nung shot 10 sülen la maneni point 2.9 agi timba liasü aser shot kar 9s nunga kashiaka lasa tejakdang liasü.

Junior women's 3P nung Karnataka nungi asayar Anoushka H Thokur-i point 460.5 ngua Sakshi ajatet, shibai point 456.3 dang nguteta liasü.

Haryana tsür Nishchal, shibai taoba küm ISSF World Cup nung silver medal ngua liasü, lai point 44.3 ngua bronze medal nguogo.

Ind vs Aus: Bumrah-i ball kanga junga ona wicket 4 agi

Luchii/December 29, 2024 (Agencies): Melbourne nung India aser Australia na Test asaya pezübuba pezünü lower-order temi yangluba run dak metaloker Australia team maneni temaba jenjang nung lir.

Mezüngbuba innings nung run 105 agi timba sür tanabuba innings tenzükba sülen pezünübuba anogo tatem tashi nung Australia team-i asayar 9 out sür run 228 yanglur liasü. Australia team-i mapang ka nungbo asayar 6 out sür run 91 dang yanglur liasü. Tanabuba innings nung India nunger bowler Jasprit Bumrah-i ball kanga junga ona run 56 agütsür wicket 4 agia liasü.

Bumrah-i, tang mezüngbuaba Test nung asaya alisang Sam Konstas out sütsü aser iba sülen ano wicket asem agia liasü. Australia nunger middle-order tem mapang ka nungbo ball 21 tsüngda asayar pezü out süa liasü.

Ajisüaka Marnus Labuschagne-i kanga dang tongtibang run 70 yanglu aser captain Pat Cummins den senteper run 57 yanglua liasü. Cummins-ia run 41 yanglu.

Asayar anaprongla ya Yashasvi Jaiswal-i catch drop süa liasü. Labuschagne-i run 46 aser Cummins-i run 21 yanglur aliba mapang Jaiswal-i drop asü. Iba asaya nung India team-i catch pezü drop asü aser pezü rongnung asembo Jaiswal-i drop süa liasü.

Nathan Lyon-a run pongu yanglur aliba mapang drop asü aser pa o Scott Boland nati run 55 yanglua India nunger bowler tem tezü dangdaktsü aser Australia-i run 333 yangluba nung teyari agüja liasü.

Lyon aser Boland nati out mesüi batting amenba ajanga Australia jenjang junga kümdaktsüogo, saka anogo tatemi Australia-i asaya declare masüba ajanga asaya draw asütsü imlar.

Asaya nung Mohammed Siraj-ia ball kanga junga ona pai run 66 agütsür wicket 3 agi liasü.

Border-Gavaskar trophy nung team anapronglai asaya kaka koka lir aser ka draw süa lir anungji tanga asaya aliba Test ya-a draw süra Sydney nung taruba hopta nungi tenzüka asayatsü aliba Test pongububa ajanga takoker bendangtsü.

BENDANGLI OSANG : Tapak 7 nungi...

South Korea nung tayimtsü ka...

Local media nung lemsatepba noksa ka nung tayimtsü nungi mokozi tanak tulu adokba nguogo. Tanga noksa ka nung iba tayimtsü tepen len mi adoker aliba aser iba anasa mibenertem aser emergency garitem anena aliba nguogo.

Yonhap news agency sangdong ka ajanga ashiba agi, tayimtsü ya airport nung anentsü merangba mapang ozü dak atsükba sülen landing gear inyaksashi mejungi küma tsükok asütsü ta amanger.

Linük News1 agency-i ashiba agi, passenger kati par kinunger ka dang ozü ka tashikang mejepdaka lir ta ashitsü atema text yoka liasü. Iba nisungba yagi tatembangbuba osang yokbaji, "ni tatembang o ashitsü asü masü?" ta zülutsür liasü.

South Korea Transport Ministry kübok aviation department nungi ketdangsur kati ashiba agi, iba tayimtsü kodasür tsükok asütsü ta asadangba mapang ozü dak atsük asütsü ta bilemba ya-a ka lir, ajisüaka tayimtsü tsükokba kuli tejangja tang tashi monguteti lir aser ken o bushisüngdangdar.

Kasa mapang nung South

Korea Acting tir Choi Sangmok-i, Muan airport nung teküzmükba maparen takok tashi inyaksü atema tetuyuba agüja liasü.

"Ken o dak sendaka aliba agency tem ajaki personnel tem kümzüktsü atema takokba tashi jenjang agütsüla," ta pai official sangdong ka ajanga metetdaktsü.

Jeju Air ya South Korea nung jenjang dalang carriers rongnung ka lir, koba 2005 küm amenoka liasü. Tayimtsü tsükokba sülen company yagi tatok meshiogo aser parnoki akokba tashi jenjang tapet agütsü ta tenangzükba agüja liasü.

Jeju Air atema tang mezüngbuba takoksa tulu ajangshia tayimtsü ka tsükokogo.

2007 küm August ita iba airline yagi achaayangba Bombardier Q400 ka nung passenger 74 mener Busan-Gimhae airport nung mopung kanga sashia aonba ajanga runway nungi ajua aoba sülen passenger aika yirua liasü.

Mongintemi ashiba agi, South Korea aviation industry ya kanga junga inyaksangshidar aser lendong aibenbo majangshi arudar.

BILEMDANGANG

"Nü sasa na metettsuji taküm nung tasaktiba mapa lir."